

IN LIBRUM SECUNDUM

C. AUGUSTINI CURIONIS

E P I T O M E .

Neapolitani belli, a Carolo VIII. Gallia rege gesti, initium & causæ. Aquarum maxima in Gallia citeriore inundatio. Judicia quædam Venetiis facta. Caroli ad Venetos legatio. Naxii in reipublicæ Venetæ fidem accepti. Ferdinandi senioris Neapolitani regis obitus. Inter Alfonso Neapolitanum regem & Alexandrum Pontificem colloquium & fœdus. Classis contra regem Thracium apparatus. Florentinorum ad Senatum pro consilio petendo legatio. Scardona & Clissa se sponte Venetis subjiciunt. Caroli regis in Italiam adventus. Joannis Galeatii Mediolanensium ducis obitus. Petrus Medices Florentia pellitur. Caroli regis in Italia res gestæ. Bajasetis legatus a Senogallia principe violatur. Venetorum longæ naves in Britanniam missæ fluctibus absorbentur. Alfonsi regis Neapoli discessus, ejusdemque obitus, cui Ferdinandus filius in regno succedit. Giemis Sultani obitus. Ferdinandi regis Neapolitani fuga: & Caroli ingressus. Turcarum ex Gallia regis victoria metus. Hispania regum ad Venetos legatio & classis in Siciliam missa. Federici Cæsaris obitus. Maximiliani regis ad Senatum legatio. Fœdus inter Venetos, Pontificem, Hispania reges, Ludovicum Sfortiam, & Maximilianum contra Carolum regem initum. Novaria ab Aloisio Gennabensi capitur. Caroli regis ex regno Neapolitano discessus. Venetorum atque sociorum contra Carolum apparatus. Pugna ad Tarum. Res in Liguria cum Gallis gestæ. Eorum, qui fortiter pugnarant, ratio a Senatu habita. Veneti, Mediolanenses, & Ligures e Caroli imperio exules fiunt. Novariæ per socios obsidio. Pax inter Ludovicum Sfortiam & Carolum regem facta, ejusque leges. Contareni de Ludovico Sfortia interficiendo consilium. Caroli in Galliam reditus.